





Claudio Phillips Mighty Talent Calypso King "Bite Me"

Mighty Talent un biaha mas a sa di retene e corona como Calypso King cu su cantica "Bite Me".

Mighty Talent ta un leyenda den temporada di carnaval, ora e subi ariba escenario ta manera energia e ta duna na su publico, e tin un gran cantidad di fans cu ta apoye y e merece. Claudio ta realmente un personahe hopi keri den comunidad y den mundo carnavalesco sigur cu si.

Cada Calypso cu e ta produci ta marca historia, e aña aki nos por a tende su parti chistoso politicamente y sigur e parti cu ta papia di e cambionan atmosferico. Ken nos ta kere? E situacionan di bida ta duna bida na e calypsonan di Claudio.



Ruben Trappenberg - Mighty Hippy Roadmarch King - Wok

Mighty Hippy tin 12 aña ta participa na e concurso di Calypso y Roadmarch, unda ela debuta cu e cancion hopi gusta ainda e "Tingeling Song" tambe conoci como e Hotdog song. E aña ey ela keda na di dos lugar y den e añanan cu a sigui e tabata casi semper un finalista.

Despues di 6 aña di participa ela dicidi di concentra riba Calypso ya cu pa motibo di trabao, tabata bira dificil pa e por a cumpli cu e cantidad di presentacionnan pa e roadmarch. Su ultimo roadmarch exitoso tabata "Buk". Den su calypsonan esun di "Chupa la cartera" a resalta dos aña pasa.

E aña aki Hippy ta conta cu ela topa cu Kevin James "The Baron" e Rey di Roadmarch Jum-B den e temporada di Pasco. Ya cu semper e kier a bay cu NBO, ela combersa cu Kevin e posibilidad pa participa cu nan. Na januari nan a bolbe topa y despues di papia brevemente riba un calypso Kevin a saca un

cancion scondi pa laga Hippy scucha. Esaki a graba e cancion despues di 10 seconde di scuche.

Poco poco e cancion a keda crece y ta despues di e prome training e cancion a gara su forma final cu a bira e "Wok". A resulta cu e esaki tabata e cancion original cu Kevin James tabata di bay cune pero despues a prefera di bay cu algo mas agresivo cu a bira "Run for shelter".

Mighty Hippy ta bisa nos cu e kier mira festival aki crece di nivel di organizacion pa bira un atraccion internacional. Na nivel musical tambe hopi por keda pa haci ainda.

Finalmente Hippy ta bisa nos cu su number di calypsonian no tin nada di haber cu e "hippienan" di añanan 60. Su "hippy" ta un abreviacion di Hipolito cu ta number di su Santo, esta San Hipolito for di unda ela haya e number ey.

